

長樂縣志卷二十二

列傳二 儒林

儒津梁乎漢宋學權輿乎程朱舊志載吾長復之唯室爲伊川之再傳勉齋二劉紹紫陽之真脈蓋季甫以後海濱崛起鄒魯如聞矣夫淵源既徵深厚則派演乃益真醇無共出而分門才矜孔賈豈同經而異注家署鄭王聖道之輔衛也經學之羽儀也惟繼緒代不乏人亦去聖遠而實近矣傳儒林

宋

陳烈字季慈陽夏人少讀書苦不能記一日讀孟子學問之道無他求其放心而已忽悟曰心未收何以讀爲閉門靜坐百餘日以求

放心後遂一覽無遺居親喪水漿不入口五日及老哀慕如孩提嘗夢痛哭其母於中庭覺而大慟至旦其孝出於天性也平居端飭遵古禮御僮僕如對賓客鄉里人敬之冠昏喪祭請而後行每訓子弟必舉烈言行以爲式從學者常數百人與侯官陳襄鄭穆周希孟稱四先生語在襄傳慶曆初預鄉薦黜於禮部遂不復踐場屋一日襄勉之求仕對曰烈不幸父母早喪幼而不知養長而能知父母則亡矣烈惟是沒身無意於世使烈一日得富貴尊榮無見父母不足以爲樂也至和間天章閣待制曹穎叔知福州薦於朝授試校書郎充本州州學教授烈固辭嘉祐三年翰林學士歐陽脩上言烈清節茂行非惟一方學者之所師致之朝廷必有

裨補近聞命以官秩使教於鄉其禮甚薄未足以稱勵賢旌德之舉除安州司戶參軍召爲國子監直講皆不拜方辭避閒福建提刑王陶奏烈以妻林氏疫病瘦醜遣歸其家十年不視爲林所訟乞奪所受恩司馬光時知諫院率同列爭曰臣素不識烈竊惟國家常患士無名檢故臣僚舉烈以厲風俗烈平生操守誠實雖有迂闊不合中道猶爲守節之士當保而全之若夫婦不相諧則聽之離絕母使節行之士爲橫辱所挫陶說遂不行葉夢得石林燕語云烈行怪多偽蔡君謨母死烈往弔匍匐而進人問之烈曰此詩所謂凡民有喪匍匐救之者也後爲妻訟其不睦事爲監司所按詔置獄劾治司馬溫公上疏救之曰烈既嘗爲近臣所推必無甚過若遽摧辱恐阻傷處士之氣然亦竟坐罪案烈孤介不合於俗所傳弔君謨母事必是惡烈者造謗之辭烈爲一時名賢所推重豈可謂行怪多偽妻訟竟以司馬光之言而解未嘗坐罪夢得語蓋不足據

熙寧二年襄除侍御史知雜舉烈自代不從後數年襄在經筵復上狀言烈心仁氣剛才智卓越學聖人之言而踐其行稽先王之法而適於時博通羣經尤明典禮其爲文章淵源浩博肆筆而成求之宿儒未有其比慶曆初以鄉貢試於禮部罷歸田里安貧力學積四十年著書數萬言仁宗嘗因近臣及本部監司論薦累降召命辭而不至世以爲潔身獨行之士是非知烈者也烈自以身載聖賢之道不爲苟進伏望陛下以禮特聘賜對清問必有以上稱尊賢重德之舉元祐元年福建提刑喻陟復上烈行誼詔以烈名在仕版自仁祖嘗以學官命之而棲遲不起宜從其所尙特授宣德郎致仕監司言烈雖老猶健請加任使明年落致仕仍充本

州教授烈不獲已乃就職不受廩俸鄉里問遺悉卻之家租有餘則推以濟貧乏卒年七十有八按烈祖世明父元善邑之沙堤人烈居二都陽夏遺址猶存元豐間孝子高宗信以里人陳烈薦及有見存石碑勒江山第一四大字亦稱里人直講陳烈書則烈爲邑人無疑矣後徙居於侯官之郎官巷故諸志俱作侯官人乾隆賀志參道光通志

陳宋霖字元零一字元滂岱邊人紹興五年進士令同安適朱子爲簿日與講明經義朱子稱其能躬行實踐後遷祕書監書問往來

不絕祀鄉賢孫枏自有傳乾隆賀志

陳侁字後之舊志作復之元符三年進士授江州德安縣主簿侁素與陳

瓘友善瓘在諫省有所彈劾多侁所裨益崇寧中蔡京當國以惡瓘故併欲害侁會江州易守京以侁名付之守伺察無所得檄侁

按田湖口縣還以旱告守卽劾侁受成胥吏失賦稅奏上遇雨赦京猶請旨勒停久之調和州司戶州有獄不應死守欲殺之侁抱牘與辯良久守怒以辭氣相加侁色平言莊徐理前語卒得平反而退同列有唁者侁曰歷陽太守叱司戶何預我哉苟殺不辜不以天下易吾介也歲滿遷建康軍節度推官父喪服除監在京河南炭場凡五年率漏未盡十刻出蒞局午而歸嘗語人曰吾爲祿仕敢不盡職然居今惟此官爲易塞責爾用薦者改宣教郎充洪州錄事州吏何奭爲姦利前後數守奭惟摘紙尾請書判侁發其姦付司理自此一府竦然承聽宣和三年代且至以疾卒於官年五十有三侁明於興衰治亂大勢當建中靖國初朝廷更張政事

侁移書侍郎鄒浩畧言天下事元祐引而西北紹聖引而東南今復引而爲元祐矣僕之私憂將恐有甚於紹聖者後黨錮起如侁言既歿許景衡楊時言國家失此人可痛惜其爲名流推重如此子長方少方同治彭志參道光通志

陳長方字齊之紹興八年進士江陰軍學教授以母爲吳中林氏遂居吳中從王信伯游隱居步里終日閉戶研窮經史以教學者其說主直指以開人心使學者歸於自得所著書曰步里客談尙書傳春秋傳禮記傳兩漢論唐論上蔡語論辯學者稱爲唯室先生信伯門下士以先生爲首上蔡語錄多佛語先生讀之知其爲江表民語凡若干條當時有鈔上蔡表民語合爲一帙者遂併以爲

長樂縣志

卷二十一 列傳二

四

儒林

上蔡之書而人莫之知也弟少方字聞之亦從信伯游時稱王門

二陳孝宗朝仕至東宮講官

參宋儒學案○案唯室先生步里客談明季尙有其書今訪求不得矣全

謝山嘗錄其一二於學案今記於此其一曰太史公有俠氣故於趙奢穰苴儀秦刺客等作傳更得手以未嘗窺聖賢門戶故五帝三王孔孟紀傳雖補綴事迹亦未盡善其一曰喻子才道王侍郎剛中語云文字使人擊節嘆賞不如使人肅然起敬此雖寥寥數語亦嘗嚮知全鼎也同治彭志

陳栢字自脩宋霖孫慶元二年特奏名受業於朱子嘗自謂善利之

問雖知所決擇而正行惡聲之念或潛萌而不自覺先覺之微言奧旨雖間有契而不能浹洽於心意之間朱子以切問近思稱之

祀鄉賢

乾隆賀志

黃杲字升卿瑀長子

瑀見名臣傳

才氣超越喜讀書嘗與弟東幹受業於

朱子紹興庚戌進士官至提刑司檢法

同治彭志

黃東字仁卿瑀次子天姿警敏簡默遲訥如不能言從朱子學嘗論春秋講貫之旨朱子答曰所示春秋大旨甚善此經當以類例相通然亦先須隨事觀理反覆涵泳令胸次開豁義理貫通方有味又曰此非獨是讀書法亦仁卿分上變化氣質底道理也後以蔭授吉州萬安縣丁內艱起知撫州樂安縣至撫一日卒於郡學官舍貧不能殮教授劉墳爲遍走僚屬告而賙之時知東名者雖非雅好亦以幣賻乃舉其櫬歸弟榦爲之誌其墓

同治彭志

黃幹字直卿瑀四子瑀沒幹往見臨江劉清之清之奇其才謂曰子乃遠到器時學非所以處子也令從朱子受業幹歸白母值大雪

卽日行既至朱子他出幹留客邸臥起一榻不解衣者三月比見朱子勵學達曙夜不解帶朱子語人曰直卿志堅思苦與之處甚有益以女妻之寧宗卽位朱子遣幹奉表行在補將仕郎丁母憂廬墓學者從之講學於墓廬者甚衆及朱子編禮書喪祭二編獨以屬幹病革遺幹深衣及所著書曰吾道之託在此吾無憾矣朱子卒幹持心喪三年調監嘉興府石門酒庫開禧初湖北安撫使吳玠將赴鎮訪以兵事幹曰聞議者欲爲大舉深入之謀果爾必敗此何時而可進取哉玠雅敬幹辟監激賞酒庫兼準備差遣官尋爲撫州臨川令改知臨江軍新淦縣邑多鄉宦舊時豪橫難制幹痛繩以法俗爲一變擢監尙書六部門未上差通判安豐軍尋

知漢陽軍按幹知漢陽軍年已六十三見文集復劉師文寶學書漢陽當吳蜀往來之衝與

武昌相唇齒每金兵南下武昌官民日夜望漢陽烽火爲安否郡故無城郭民貧兵寡仕者憚來其地闕員殆半幹視事未兼旬校閱卒伍召募壯勇脩軍政嚴守具上下始有固志值歲饑荒政具舉旁郡饑民襁至惠撫均一民大感悅卽郡治後鳳棲山爲屋館四方士立周程游朱四先生祠尋以常平使者姻黨引嫌丐祠主管武夷冲祐觀宋史本傳作以病丐祠案文集與李侍郎夢聞書中有興國趙守持本路倉節趙娶晦庵之女孫于幹以姻黨之親委有防嫌乞畀祠祿云云則非因病丐祠也然再知安慶府書云倅安豐則得罪於太守守漢陽則得罪於監司恐又不盡爲引嫌去矣未幾起安慶府至則金人破光山邊警狎至民情震恐幹奏請城安慶不俟報興工分城爲十二料先自築一料計共工

費若干然後委官吏寓公士人分料主之悉準其一料之費計田出役力均費省番休遞代整有成法每五鼓坐堂上授濠砮官以一日成算然後治事暇則會僚佐講究邊防利病後二年金人破黃州沙窩諸關淮東西皆震獨安慶屹然安堵繼而霖潦餘月大水暴至以城故得無虞士民喜相謂曰生我者黃父也制置使李玨辟爲參議官再辭不就既而朝命改知和州令先赴玨稟議宋史本傳云朝命與徐僑兩易和州案文集復楊志仕書云二月敵攻浮光令往黃州守禦已而敵勢頗熾又令往光州督戰既而歷陽徐守求去遂令兩易歷陽卽和州也本傳不言黃州守禦及光州督戰事附此以備考

先是幹遺玨書畧言南北大勢有深可慮者紹興議和但不能取中原耳今日議和且併江南而棄之戰既不可和又不可以彼之憤激當吾之偷惰此

非上下一意警策奮勵使長淮屹然有可恃之勢未見其可也復言今日之計莫若用兩淮之人食兩淮之粟守兩淮之地然當先明保伍保伍既明則爲之立砦蓄馬制軍器以資其用不過累月軍政可成且淮民遭丙寅厄後聞金人還汴莫不狼顧脅息有棄田廬挈妻子渡江之意其間勇悍者且將伺變竊發若不早爲之圖則兩淮日見荒墟卒有警急攘臂而起矣至是珏將視師維揚邀幹偕行幹復爲珏畫禦敵計珏皆不能用其時幕府多輕儇士將裨離心諸司長史張宴無虛日幹知不足與共事歸自維揚力辭和州之命且復諫珏曰殘金君臣上下日夜經營必欲得吾兩淮而後已雖以歲幣爲名而實不在乎歲幣也去歲五月休兵之

後使吾早夜竭力以固吾圉何至今春三邊衝突如入無人之境豈可不深鑒耶浮光敵退已兩月安豐敵退已一月盱眙敵退亦已兩旬邊備之弛又甚於前竊意千乘言旋必將痛自咎責日與僚屬討論條畫審思而力行之以爲後圖今歸已五日矣但聞請總領運使至玉麟堂賞牡丹用妓樂而已尙書以法從之尊當四路之寄敵國交侵內宇騷動主上食不甘味聽朝不怡尙書豈得不朝夕憂懼而乃如是之迂緩暇樂耶今浮光之報又至矣金欲以十六縣之衆侵五關且以一縣五千人爲率當有八萬人吾之守關不過五六百人則關之不可守決矣五關失守則蘄黃必不保蘄黃不保則江南危尙書聞此已數日乃不聞有所施行何耶

宜調武定五六千人分屯固始光山以捍其深入調蘄黃民兵以守五關仍檄湖北帥臣協同守禦庶乎可以無憂苟爲還朝之計而慮不及此非所以望尙書也厥後光蘄黃繼失果如幹言已而幹入廬山訪李燔李宓相與盤旋玉淵三峽閒俛仰朱子所游舊跡講乾坤二卦於白鹿書院南北之士皆集未幾召赴行在奏事除大理寺丞不拜初幹入荆湖幕府奔走諸關豪傑往往願依幹後倅安豐守漢陽安慶聲聞益著長淮軍民翕然心嚮在位者慮幹入見必直言邊事以悟上心羣起擠之遂罷幹既歸里編禮著書日不暇給弟子從游者日盛質疑請益如朱子在時俄命知潮州辭主管亳州明道宮踰月致仕卒後數年贈朝奉郎與一子下

州文學追諡文肅學者稱勉齋先生清雍正二年從祀孔子廟

庭所著有經解文集行世

乾隆賀志參道光通志 舊志云按瑀子杲東幹諸志俱作閩縣人考黃氏家譜及勉齋先生文集瑀世居青山後寓閩縣子孫有籍焉者故云今特正之

劉嘉譽字德稱一名岡方安里人貽孫八代孫也嘗受業延平李侗

之門官樂昌縣尉子世南孫砥礪曾孫子玠

乾隆舊志

劉世南字景虞嘉譽子少承家學長從林之奇游與呂祖謙相厚秉

禮蹈義鄉黨敬之官吉州司理參軍

乾隆賀志參道光通志

劉砥字履之號存菴世南子六歲日誦千言覽忠孝大節輒激憤感慨十歲通九經傳記能綴詞賦乾道二年與弟礪同登童子科嘗讀釋老書嘆曰此不足習乃治舉子業又嘆曰此不宜專習聞朱

子得濂洛之傳率其弟礪師事焉朱子嘉其志篤學敏授以太極圖充然有得朱子晚脩禮書砥預編次以時方攻道學遂無復仕進意蔡元定黃幹與之相友善因顏其讀書之室曰龍峰巖卒年四十五著有王朝禮論語孟子解爲文醇雅宏博詩不加琢磨而能達其意

乾隆賀志參
道光通志

劉礪字用之號在軒砥弟幼穎悟孝弟中童子科後與兄砥同受學於朱子朱子嘗曰履之兄弟卻差勝若更加功或可望耳與黃幹最友善朱子答陳才卿書曰禮書得直卿用之漸可整頓又曰二劉到此並手料理方有汗青之日及禁僞學志尙愈篤蔡元定編置道州礪與兄獨冒時禁厚餽之卒年四十七與兄砥同祀於鄉

長樂縣志

卷二十一 列傳二

九

儒林

乾隆賀志參
道光通志

劉子玠字君錫號立齋砥子幼孤育於外家長從勉齋學非賢士不交非義理書不讀嘗教戒子弟曰行好事作好人足矣僥求名利非吾志也平居退讓若無所有及其見義必爲則有人所難能者嘗遜田數百畝與諸子姪以成母志年四十八卒

乾隆賀志

張洽字元德十一都福州裏人嘉泰二年進士少穎異從朱子學自六經傳註以下皆究其指歸嘗取管子思之思之又重思之思之不通鬼神將通之語以爲窮理之要朱子嘉其篤志嘗謂黃幹曰所望以永斯道之傳如二三君者不數人也授松滋尉時湖右經界弊甚洽請行推排法令民自實其土地疆界產業之數投於匱

籌覈而次第之吏姦無所匿改袁州司理參軍有盜黠甚訊莫能決會有兄弟訟財者洽諭之曰冒法以求勝孰與守分以全愛乎訟者感悟盜聞之自伏尋知永新縣湖南鄱寇作亂與縣接壤民大恐洽單車往鎮定之寇竟不至通判池州有張德脩誤蹴人死獄吏誣以故殺會歲大旱禱弗應洽白持刑爲辨寃復白守寬催科以召和氣雨隨注以病請祠主管建昌仙都觀袁甫提點江東刑獄招主白鹿書院洽曰是先師之跡其可辭乎至則選好學之士日與講說凡養士之田沒於豪右者復之端平初除祕書郎遷著作佐郎待以說書洽固辭遂除直祕閣主管建康崇禧觀以疾乞致仕卒贈直寶章閣諡文憲洽少以主敬爲學故以主一名齋

平居不異恒人至義所當爲則勇不可奪居閒不言朝廷及聞災異變故輒顰蹙不樂一君子進用士大夫直言得失則喜見顏色著有春秋集註春秋集傳左氏蒙求續通鑑長編事畧地理沿革

表行世

乾隆賀志

鄭申之字唯任號湖波福湖人乾道五年進士官國子監助教朱子避僞學禁來邑時申之從之游教授於鄉及門甚衆立文行忠信

四齋以處之朱子匾其所居樓曰聚遠

乾隆賀志參道光通志

姜大中字叔權楓林人以布衣從學於朱子嘗以識察此心爲致知之切近問朱子曰所謂識之非徒欲識此心之精靈知覺也乃欲識此心義理精微耳欲識其義理之精微固當以窮至天下之理

爲期至於久熟而貫通則不待一一窮之而天下之理固已無一毫之不盡矣叔權服膺此言學者稱楓林先生

同治彭志

陳夢良字與叔桃坑人朱子避僞學禁主其家因從受業朱子甚重之題聖經於其書室中學者稱烏門先生後室圯壞里人就其地立祠祀朱子先生配焉

同治彭志

陳如晦字日昭號六湖沙隄人幼嗜學貫串經史從勉齋游嘗讀西山真氏夜氣箴作曰須見得冬爲四時之夜夜乃一日之冬便是自家嚮晦入息處又見得造化發育之妙便是自家事物周旋處於此敬義夾持動靜交養則兩得之矣遂次其韻爲生意箴西山見之亟加稱賞一時耆德鉅公樂與爲交毅齊鄭性之巖齋趙師

長樂縣志

卷二十一 列傳二

十一

儒林

恕先後延講於鼇峰精舍邑令吳一鳴延講於學宮晚以趙汝騰薦充經筵不果授本州教授卒著有論語問答及講義文集祀鄉

賢

乾隆賀志

李晦字隨甫 人勉齋嘗貽之書曰一去鄉者十五年投老歸來每興索居之嘆承示論語疑義用心甚苦所謂空谷足音也其後先生遂學於勉齋

同治彭志

元

郭陞字德基世以明經顯號書櫥郭家父正子宋紹定五年進士教授廉州著春秋傳論治春秋者多師之稱存齋先生陞少孤母林氏力貧以教長通六經尤深於易治易者復師郭氏易咸淳中補

太學生宋亡居鄉講學至元中郡舉遺逸授泉山書院山長遷興化教授改吳江州教授代還大德九年方議築精舍於六平山是冬屋四偏所植梅忽槁陞見之微笑遂不果築明年春再調興化未行卒學者私謚純德先生陞志尚高潔登山臨水雅歌投壺賓饌無虛日酒酣作文下筆不少休每一篇出閩士爭相傳寫效其體然未嘗少自矜衒人有一善稱之不置故人樂出其下所至三郡士相賀以爲得師翰林學士承旨程鉅夫爲閩海廉訪使時雅敬陞及陞卒志其墓曰先生談經明白統貫不刻鑿以爲異其爲人疏通慷慨謹簡易直爲子爲父孝而慈與人交彌久而孚益遠而不可忘人以爲確論詩文亦和平沉深有梅西集二十卷行世

子履由太子太傅府長史出知靖州

乾隆賀志參道光通志

敖繼公字君善研窮經史尤長於禮以儀禮鄭康成舊注未備取賈公彥疏及先儒說補其闕附以己見名曰集說大德中寓烏程築一小樓冬不爐夏不扇吳下學者多從之游初仕定成尉以父任當補京官讓與其弟浙西平章事高彥敬薦爲信州教授尋擢進

士對策忤時遂不仕

乾隆賀志參道光通志

歐陽仇字以大號道江十四都人初舉進士不第隱居著述親沒不用浮屠禔身動循禮法學者師焉時偕藍田陳有霖行鄉約里人稱歐陽先生著有四書釋疑五經旨要性理字辨格物啓蒙忠孝大訓女學幼範等書及卒門人王堅爲營墓葬祀鄉賢子潮舉莆

田教諭通五經稱五經先生乾隆賀志

清

謝震榜名在震字甸侯寄籍侯官乾隆己酉舉於鄉順昌教諭重氣誼篤

好漢學通地理有志用世而不遇於時年四十六卒有禮案二卷精覈勝敖氏閩士之能言禮者也亦工詩有櫻桃軒詩集二卷道光

通志

陳庚煥字道由號惕園古縣人高祖驤字叔舉其父被累入獄驤匍匐往請以身代事解奉親避居九仙山下能詩與兄騶從許友脩平遠臺詩社著有中軒薊游二集庚煥少好學父峰勗之曰秀才不知時務授以官如暮夜徒行豈非俗學之誤耶故庚煥自天文

地理樂律兵法水利河防以及農桑方伎之書無不讀嘗擷錄其可行者既從蔡容游又與謝金鑾交所學益務實踐親病嘗藥滌穢不少懈瀕危以減算籲於神居喪疏食不入內待羣從有恩養寡姊於家公產有盜賣者族人將訴官庚煥急捐己產充公事賴以解生平不言人過於經傳傳譌多所考正前賢事蹟有未彰者爲之補傳宋李綱墓在侯官明錢肅樂墓在福清許天錫墓在閩縣皆爲鳩貲脩葺拾遺金於道守還之嘉慶元年郡縣議舉孝廉方正辭後知縣又議舉實學未終喪不應以歲貢生終年六十四所著書有童子撫談莊嶽談閩學源流說氣稟說問學贅說二十二史圖惕園初稿外犒詩犒漫存師門瓣香錄尊聞錄于麓塾談

崇德同心錄凡若干種道光六年祀郡邑鄉賢祠

同治彭志參
道光通志

謝章鋌字枚如先世本浙江上虞人宋末名星者知玉融州遭亂僑居平潭東嵐村明初繇海山入江田爲長樂人曾祖世南祖蕢父鵬年俱縣學生章鋌生而孱弱多病年十一始就傅嘗於故麓得其曾祖所著蒙養講義四種讀之知有宋儒性理之學益博覽載籍聚書日多寢淫而爲詞章遇名篇俊句輒錄副既而好考據家言每得一書則臚其首尾大要識之因有我見備忘之錄年十九補弟子員時天下多事慨然有建樹之志讀通鑑列史與古今經世諸書而爲經濟之學道光己酉中副車同治甲子領鄉薦由中書舍人第光緒丁丑進士顧年垂老無復仕宦志矣初章鋌家有

生產間驟落遂橐筆游四方嘗依劉家謀教諭於寧德稱莫逆交迄家謀卒數十年言之猶掩涕不忘咸豐初年主講漳州丹霞芝山兩書院時粵寇方張章鋌慨念時事作東南兵事策其略云天下皆苦無財而不足於用也吾則曰節用天下皆苦無兵而不足於戰守也吾則曰減兵夫養萬兵而不得一兵之用何如養數千兵而得萬兵之用乎又曰爲將之道自與兵同甘苦始與兵同甘苦自不愛錢始錢塘吳觀禮見而賞之曰使當時大吏能用君言何待於募勇也同治丙寅游山西佐學使校閱試卷由溧陽彭湘獲交黃崗鄧琛爲之題其母機聲燈影課讀圖至京過諫草堂懷建寧張際亮堂在松筠庵左晉江陳慶鏞劾三大臣疏出際亮手

蓋在堂起草也故章鋌特眷眷焉己巳至陝西就兵備道同郡趙新之聘貧甚適布政使林壽圖亦同郡人雅重儒學言章鋌於巡撫劉蓉蓉方欲覓人揆文介母壽亟以屬章鋌旋延主同州及豐州講席禮待甚厚是年偕壽圖游華山明年春復與主事王軒同游有華山後游記既將入都關中諸生相聚設餞於衢尊閣繪圖爲紀復爲人招游玉泉院至青柯枰而止於是章鋌之足跡三及華嶽矣瀕行出鄉人謝金鑾所著教諭語視道員呂耀斗耀斗爲授梓人遂至都未幾旋閩重主漳州講席丁丑通籍後至江西主白鹿洞書院歷匡廬諸勝將歸門生洪嘉與請爲學大指語之曰學擇漢宋之要人以狂狷爲歸發南昌道出崇安探武夷巖窮其

幽奧遂歸掌致用堂教凡十六年所成就弟子甚多年八十四卒章鋌性厚而氣肅平居未嘗一日晏起雖盛暑嚴寒必整衣端坐無倦惰之容遇先人忌日必涕泣不已至衰老猶然手置書數萬卷丹黃斟酌終身不輟與人交肝膽輪困於取與辭受之際尤嚴饑驅垂老有所知貴人欲爲之地笑謝弗受也生平論學旨要具撰示及門三篇其首篇畧曰天下之不治由於吏治之不修夫吏治非刻薄寡恩之爲也亦不容急功而好名也要在能通天下之情而已矣然其立法則自吾身始有一私不染之操方有萬物在抱之心吾見今之爲吏者大抵立身無法持家無法因而治民無法民不治官亦不保喪名失身爲世詬病者比比也古之人視家

若國蓋凜凜有限制而不敢徇焉又視國若家蓋懇懇有恩義而不敢外焉家人畏之若嚴君百姓愛之若慈父而吏治乃可言矣而州縣獨與民親其治也得名最易其不治也受禍亦最烈卽以近事徵之粵西之亂也由知縣之納匪賂四川之亂也由知縣之虐釐稅貴州銅仁之亂也由知縣之加征收卒之身殘家破禍延數省而六合之溫紹元天津之謝子澄不過一縣令耳乃能以一隅抗賊氛控制江淮保障神京生爲名臣死而廟祀然則州縣亦在乎人之爲之而已其次篇畧曰學道者持身涉世求合於道而已矣高明沉潛性情所近學術各有所偏至無論陸與朱不同程張與周邵果盡同乎無論姚江與諸儒不同白沙定山與崇仁河

東果盡同乎要其表裏如一而皆無愧於聖賢後世之談理學者內省不能無憾於學派爭之則甚力奉一先生之片言爲依歸初無由博返約之功其於吾道果有合乎未敢知也嗟乎古之人萬里從師千里訪友百里借書當其小心低首重席之下卽其得意昂頭九霄之外嗚乎其有以哉其有以哉故曰泰山不讓土壤乃能成其高河海不擇細流乃能成其大其三篇畧曰夫子之文章可得而聞也後世若揚雄若王通揣摩章句以陽虎爲聖人而赫然大名尙及於千古況夫挈吾心以納於經充滿漸漬之其性情既與經合而其文章有不油然光醴然味粹然氣哉昌黎之文深於經者其碑似書其銘似詩其志傳尤精於史例其雜文則出入

於孟荀與禮由韓推而上之其道可不悖於聖賢即使不能成家亦不至冗濫猥陋不可爲訓而子長相如班張崔蔡之流皆可執韓以定其離合蓋由經達史之義也且夫古之雄於文者於經皆有所著述今之所存韓則有論語解柳則有非國語歐陽則有詩本義蘇則有易傳書傳元明以來之文家其學經殆苟焉耳故高者僅能成章而於世道人心無所發明下者彪炳於外其中如五石之瓠枵然無濟於用也蓋求文於文不求文於經也子曰脩辭立其誠又曰辭達而已矣不誠者性情不能固其體也不達者經史不能佐其用也故能治經治史治性情以爲文則其人必光明英多無俗行其行文亦必高遠淵深無鄙語卒後郡人思其教澤

附祝於祥符沈公祠所著已刻者賭棋山莊文集九卷詩集十四卷酒邊詞四卷圍爐瑣憶藤陰客贅各一卷稗販雜錄四卷說文閩音通二卷詞話十卷課餘偶錄四卷續錄四卷其賭棋山莊餘集五卷毛詩尚書左氏傳註疏毛本阮本考異二卷未刻藏於家